



ჯანმრთელობის დაცვის და სოციალურ საკითხთა
კომისიის სხდომის ოქმი №56

19 აგვისტო 2025 წელი

14:00 საათი

ა/წ 19 აგვისტოს ქ.თბილისის მუნიციპალიტეტის საკრებულოში ჩატარდა ჯანმრთელობის დაცვის და სოციალურ საკითხთა კომისიის სხდომა.

სხდომას ესწრებოდნენ ჯანმრთელობის დაცვის და სოციალურ საკითხთა კომისიის წევრები:

1. ზურაბ ჩიკვილაძე;
2. შალვა ოგბაიძე;
3. ანა კაკაბაძე;
4. ნათია მოდებაძე;
5. მარიამ გელაშვილი.

მოწვეული პირები:

ქალაქ თბილისის მუნიციპალიტეტის მერიის ჯანდაცვისა და სოციალური მომსახურების საქალაქო სამსახურის წარმომადგენელი თამარ გოგიტიძე.

სხდომის დღის წესრიგი:

- „ქალაქ თბილისის მუნიციპალიტეტის ბიუჯეტით გათვალისწინებული ჯანმრთელობის დაცვის ქვეპროგრამების განხორციელების წესების დამტკიცების შესახებ“ ქალაქ თბილისის მუნიციპალიტეტის საკრებულოს 2024 წლის 27 დეკემბრის №50-99 დადგენილებაში ცვლილების შეტანის შესახებ“ ქალაქ თბილისის მუნიციპალიტეტის საკრებულოს დადგენილების პროექტი.

სხდომას თავმჯდომარეობდა ჯანმრთელობის დაცვის და სოციალურ საკითხთა კომისიის თავმჯდომარე ზურაბ ჩიკვილაძე. სხდომის თავმჯდომარემ სხდომა გახსნილად გამოაცხადა,



დამსწრე წევრებს წარუდგინა ჯანმრთელობის დაცვის და სოციალურ საკითხთა კომისიის სხდომის დღის წესრიგი და სიტყვა გადასცა ქალაქ თბილისის მუნიციპალიტეტის მერიის ჯანდაცვისა და სოციალური მომსახურების საქალაქო სამსახურის წარმომადგენელს თამარ გოგიტიძეს, რომელმაც წარმოადგინა ქალაქ თბილისის მუნიციპალიტეტის ბიუჯეტით გათვალისწინებული ჯანმრთელობის დაცვის ქვეპროგრამების განხორციელების წესების დამტკიცების შესახებ ქალაქ თბილისის მუნიციპალიტეტის საკრებულოს 2024 წლის 27 დეკემბრის №50-99 დადგენილებაში ცვლილების შეტანის შესახებ ქალაქ თბილისის მუნიციპალიტეტის საკრებულოს დადგენილების პირველი მუხლის „ზ“ ქვეპუნქტით დამტკიცებული „გაფანტული სკლეროზის სამკურნალო მედიკამენტებისა და კვლევის დაფინანსების ქვეპროგრამის განხორციელების წესის“ (დანართი N7) მე-4 მუხლის მე-4 პუნქტის ცვლილება.

წარმოდგენილი პროექტის მიზანია, მედიკამენტ „ოკრელიზუმაბის“ კანქვეშა ფორმის დანერგვა და გაფანტული სკლეროზის მქონე პაციენტებისთვის მკურნალობის თანამედროვე ფორმებზე ხელმისაწვდომობის გაზრდა.

პროექტის თანახმად, ცვლილება შედის ზემოაღნიშნული დადგენილების პირველი მუხლის „ზ“ ქვეპუნქტით დამტკიცებული „გაფანტული სკლეროზის სამკურნალო მედიკამენტებისა და კვლევის დაფინანსების ქვეპროგრამის განხორციელების წესის“ (დანართი №7) მე-4 და მე-9 მუხლებში. კერძოდ, მე-4 მუხლის მე-4 პუნქტში დამატებით გაიწერება „ოკრელიზუმაბის“ კანქვეშა ფორმის შეყვანის პროცედურა, დოზირება, ვინაიდან, წესით გათვალისწინებულ „ოკრელიზუმაბის“ ინტრავენური ფორმას ემატება კანქვეშა ფორმაც და გაფანტული სკლეროზის მქონე პაციენტებისათვის ხელმისაწვდომი იქნება მკურნალობის თანამედროვე საშუალებაც. „ოკრელიზუმაბის“ კანქვეშა ფორმით მკურნალობის შედეგად, პაციენტი ნაკლებ დროს ატარებს კლინიკაში და ასევე იზოგება სამედიცინო პერსონალის რესურსიც. არსებულ საერთაშორისო მონაცემებზე დაყრდნობით, გაფანტული სკლეროზის მქონე პაციენტს შეუძლია მიიღოს მკურნალობა „ოკრელიზუმაბის“ როგორც ინტრავენური, ასევე კანქვეშა ფორმით. ამასთან, ექიმისა და პაციენტის ერთობლივი გადაწყვეტილებით, შესაძლებელია, უკვე მკურნალობის პროცესში მყოფ პაციენტს, მედიკამენტის ინტრავენური ფორმა შეეცვალოს კანქვეშა ფორმით. კლინიკური კვლევებით დადასტურებულია მედიკამენტის ინტრავენური და კანქვეშა ფორმების ეფექტურობის და უსაფრთხოების ერთნაირი პროფილი, კერძოდ, პრეპარატის ფორმის ცვლილება არ გამოიწვევს დადგენილი სქემის ცვლილებას. „ოკრელიზუმაბის“ კანქვეშა ფორმა არის დამატებითი შესაძლებლობა, იმისათვის რომ გაფანტული სკლეროზის მქონე პაციენტმა შეძლოს სრულფასოვანი ცხოვრების წესის შენარჩუნება. ქვეპროგრამა კი სწორედ აღნიშნულ შესაძლებლობას აძლევს ქალაქ თბილისის მუნიციპალიტეტში რეგისტრირებულ ბენეფიციარებს. წესის მე-4 მუხლის მე-4 პუნქტში გაიწერება პრეპარატის კანქვეშა ფორმით შეყვანის დოზირება, კერძოდ, „ოკრელიზუმაბი“ კანქვეშა ფორმა - საწყისი დოზა 920 მგ შეყვანილი უნდა იქნეს ერთ ინექციად, შემდგომი ინექციები - ყოველ 6 თვეში ერთხელ დოზით – 920 მგ.

პროექტის თანახმად, წესის მე-9 მუხლის პირველ პუნქტში გაიწერება ასევე მიმწოდებლისთვის დადგენილი დამატებითი პირობა. კერძოდ ქვეპროგრამით



გათვალისწინებული მედიკამენტის მიმწოდებელი უნდა უზრუნველყოფდეს ქვეპროგრამის ფარგლებში „ოკრელიზუმაბის“ 920 მგ (კანქვეშა ფორმა) (1 ფლაკონი) არაუმეტეს 10 600 ლარის ტარიფით მიწოდებას.

კომისიის თავმჯდომარემ ზურაბ ჩიკვილაძემ სხდომის დღის წესრიგით გათვალისწინებული საკითხი კენჭისყრაზე დააყენა. აღნიშნულ საკითხს დამსწრე კომისიის წევრების სრულმა შემადგენლობამ დაუჭირა მხარი.

მომხრე: 5

წინააღმდეგი: 0

თავი შეიკავა: 0

კომისიამ დაადგინა

პროექტი განხილულ იქნას საკრებულოს უახლოეს სხდომაზე ჯანმრთელობის დაცვის და სოციალურ საკითხთა კომისიის უმრავლესობის დადებითი რეკომენდაციით.

კომისიის სხდომის თავმჯდომარემ სხდომა დახურულად გამოაცხადა.

ჯანმრთელობის დაცვის და სოციალურ
საკითხთა კომისიის თავმჯდომარე

ზურაბ ჩიკვილაძე